

# Der Hingerbärg

Es isch mer e grossi Fröid u würklich sehr dra g'läge  
über dä toll Ussicht's Punkt ob der Chile öppis z'säge

vo Roggu us bi ni mängisch z'Fuess uf Langetu g'loufe  
und mit der Mueter uf e Märit go Salat - Setzlig choufe

mi erschi Schueureis het mit em Jura Bähnli a g'fange  
isch uf e Hingerbärg, zu de Pfaue, Reh u Hirsche gange

nach der RS ha ni der Hingerbärg de angersch g'nosse  
u no im aute Schützehus, s'Obligatorische, g'schosse

i bi wäge der extrem lute Knallerei no fescht erchlüpft  
es het bim Dach, fasch d' Biberschwanz - Ziegu g'lüpft

wo si vor de Schibe ufghört hei, mit der Chöue z'winke  
bi ni ad Theke, go nes Würschtli ässe und öppis trinke

der Füglischtaller Hans het der Louf putzt und näi i g'fettet  
und mir, trotz knappe Resultat, dä chlefig Tag, g'rettet

der Schiessplatz isch saniert worde und d' Hütte abgrisse  
und aui Tier im Hirschpark, düe dä Lärme nid vermisste

i de Manöver vom Regimänt 16 het's is nid öppe gruset  
mir hei uf em Rindlisbacher Höisctock herrlich pfuset

hinger em Wäudli, mit de grosse Eiche u Chräie i Schare  
isch dä Bur no im Zilinder, Kutsche u de Ross us g'fahre

ar Promenade uf em Bänkli si 2 Verliebti, si treit e Bluse  
i bi gleitig verbi gloufe ohni z'luege, ob si witer schmuse

druf abe bini du ou abghocket u lose wie ne Amsle singt  
und unge am Geisbärg us em Chileturm s' Gloggeglüt klingt

mi g'schpürt's, do het eine über üs, s' Zepter i der Hang  
di fridlechi Schtimmig und am Jura dä toll Sunneungergang

liebi Langethaler, gniesset der Hingerbärg u das Gschänk  
vo üsem Verschönerigs Verein, mit de schöne rote Bänck

jo s' Läbe isch nid gäng nume Sunneschin u frohlocke  
um so meh lohnt es sich, uf eim vo dene Bänkli, z'hocke

dä Blick gäge Jura, Rogge, Schwängimatt u Wisseschtei  
het scho vili verzouberet, si si lenger blibe u nid grad hei

mi cha Schtress abboue u wenn de s'närvös si noche lot  
wird's warm im Härz u mi gniesst das prächtige Oberot